

續
文
獻
通
考

續文獻通考卷之六十九

皇明進士雲間王圻纂輯

節義考 孝子一

虞舜父頑母嚚嘗耕稼陶漁以隆孝養帝堯將遜位四岳舉舜乃使其子九男二女百官牛羊倉廩備以事舜於畎畝天下之士就之帝將胥天下而遷之爲不順於父母如窮人無所歸卒之瞽瞍底豫而天下化孔子曰舜其至孝矣楊子曰事父母母自知不足者其舜乎

周文王爲世子朝於王季日三雞初鳴而衣服至於寢門外問內豎之御者曰今日安否何如內豎曰安文王乃喜及日中又至亦如之及暮又至亦如之其有不安則

內豎以告文王文王色憂行不能正履王季復膳然後
亦復初食上必在視寒暖之節食下問所膳命膳宰曰
未有原未勿也原再也謂所食之餘不可再進也應曰諾然後退文王有疾
武王不脫冠帶而養之文王一飯亦一飯文王再飯亦
再飯

周公旦事文王行無專制事無由已身若不勝衣言若不
出口有奉持於文王洞洞屬屬如將不勝如恐失之可
謂能子矣

春秋

尹伯奇吉甫之子也爲後母所讒而見逐乃編芰荷以爲
衣采掇花以爲食清朝履霜援琴而歌從親之命不敢

有怨

老萊子楚人孝奉二親行年七十作嬰兒戲身着五彩斑斕之衣嘗取水上堂詐跌仆地爲小兒啼哭離於親側欲親之喜

穎考叔鄭封人也莊公以共叔段故置母姜氏于城穎而誓之曰不及黃泉無相見也既而悔之穎考叔聞之有獻于公公賜之食食舍肉公問之對曰小人有母皆嘗小人之食未嘗君之羹請以遺之公曰爾有母遺緊我獨無考叔曰何也公語之故且告之悔考叔曰若掘地及泉隧而相見其誰曰不然公從之公入而賦大隧之中其樂也融融姜出而賦大隧之外其樂也洩洩遂爲

母子如初君子曰穎考叔純孝也愛其親施及其君詩
曰孝子不置永錫爾類其是之謂乎

晉申生獻公子也獻公信驪姬之讒謂其謀毒害父公欲
殺之人勸自明申生曰君安驪姬若自明驪姬必得罪
是使君不安也人又勸之行申生曰吾被殺父之名正
下豈有無父之國哉其誰與我于是之新城自經而死
人號其世子

剡子性至孝母病思鹿乳乃衣鹿皮入鹿群中求之卒遇
獵者彎弓欲發亟告之故乃得免競遺以鹿乳

子路字仲由事親至孝家貧食藜藿之食爲親負米於百
里外親歿之後南遊於楚從車百乘積粟萬石累茵而

坐列鼎而食乃嘆曰雖欲食藜藿之食爲親負米何可得也孔子聞之曰由也可謂生事盡力死事盡思者也魯參字子輿孔子以爲能通孝道故受之業孝子經嘗曰往而不可還者親也至而不可却者年也椎牛而祭墓不如雞豚之逮親存也故吾嘗仕齊爲吏祿不過鍾釜尚猶欣欣而喜者非以多也樂其逮親也既歿之後吾常南遊於楚得尊官焉猶比鄉而泣悲者非爲賤也悲不逮吾親也故家貧親老不擇官而仕若夫信其志約其親者非孝也

閔損字子騫早喪母父娶後妻生二子母嫉損所生子衣綿絮衣損以蘆花絮父冬月令損御車體寒失朝父察

知之欲遣後妻損啟父曰母在一子寒母去三子單父
善其言而止母亦尋悔遂成慈母

皐魚哭於道孔子行聞其聲甚悲避車而與之言曰子非
有喪何哭悲也皐魚曰樹欲靜而風不止子欲養而親
不待往而不可返者年也去而不可得見者親也吾請
從此辭矣

高子羔執親之喪泣血三年未嘗見齒君子以爲難爲成
宰成人有其兄死而不衰者聞子羔將至遂爲衰

少連大連善居喪三日不怠三月不懈期悲哀三年憂
樂正子春下堂而傷其足數月不出猶有憂色門人問曰
何也樂正子春曰吾聞諸曾子曾子聞諸夫子曰天之

所生地之所養惟人爲大父母全而生之子全而歸之
可謂孝矣不虧其體不辱其身可謂全矣故君子頃步
而不敢忘孝也今予忘孝之道予是以有憂色也

孟莊子魯大夫其父獻子有賢德莊子能用其臣守其政
曾子曰吾聞諸夫子孟莊子之孝也其他可能也其不
改父之臣與父之政是難能也

漢

文帝初封代王居代時母薄太后嘗病三年爲之日不交
睫衣不解帶湯藥非口所嘗弗進仁孝聞於天下

石建萬石君膏之子爲郎中令每五日洗沐歸謁親入於
舍竊問侍者取親中幕廁廁身自澣灑復與侍者不敢

令萬石君知之以爲常萬石君卒建哭泣哀思杖乃能
行諸子孫感化其孝

韓伯俞梁人嘗有過其母笞之泣其母曰他日笞子未嘗
泣今泣何也對曰俞得罪笞常痛今母乏力笞不覺痛
是以泣

于未東海鄒人父定國死居喪如禮以孝行聞

蔡順字君仲汝南人以至孝稱少孤養母嘗出求薪有客
卒至母望順不還乃啣其指頭順心即動棄薪馳歸王
莽時人相食順拾桑椹赤黑異器遇赤眉賊問故順曰
黑者奉母赤者自食賊因遺米受而不食母終未葬里
中火將逼其舍順伏棺號哭火遂越燒他室順得獨免

母平生畏雷亡後每有雷震順輒環塚泣曰順在此太
守鮑衆舉孝廉順不能遠離墳墓遂不就

東漢

樊儵字長魚南陽人事後母至孝及母卒哀毀過禮光武
帝常遣中黃門朝暮送饘粥

祭遵潁陽人喪母負土起墳位至征虜將軍

鄧禹字仲華新野人事母至孝封高密侯卒謚元侯

姜詩字仕遊廣漢人事母至孝妻龐氏奉順尤篤母好飲
江水水去江岸六七里常命子汲子溺死不令母知託
言遊學妻泝流而汲後值風雨不時得還母渴詩責而
遣之妻乃寄止鄰舍晝夜紡織市珍羞使鄰母以意自

遺其姑如是者久之姑怪而問鄰母鄰母具對姑慚感呼還奉養益謹姑嗜魚膾又不能獨食夫婦常力作供膾呼隣母共之舍側忽有湧泉味如江水每日輒出雙鯉常以供二母之膳明帝永平二年察孝廉詔曰大孝入朝凡諸舉者一聽平之由是皆拜郎中

董永千乘人少失母獨養父父亡無以葬乃從人貸錢一萬永謂錢主曰後無錢還君當以身作奴主甚憫之永得錢葬父畢將往爲奴於路忽逢一婦求爲永妻永曰貧若是身復爲奴何敢屈夫人爲妻婦曰願爲君婦不耻貧賤永遂將婦至錢主主曰本言一人今乃有二永曰言一得二理何乖乎主問永妻曰何能曰能織耳主

曰爲我作絹三百匹即放爾於是索絲一月之內三百匹絹足主驚遂放夫婦二人去行至舊相逢處乃謂未曰我天之織女感君至孝天使我爲君償債君事畢不得久停語訖雲霧四垂騰空而去

廉范字叔度京兆杜陵人父遭喪亂客死蜀漢范遂流寓西州西州平歸鄉里年十五辭母西迎父喪與客步負喪歸葭萌載船觸石破沒范抱持棺柩遂俱沉溺衆傷其義鉤求得之療救僅免於死范將父骨歸葬畢詣京師受業顯宗時累官至蜀郡太守

魯恭平陵人父建武初爲武陵太守卒恭年十二弟丕七歲晝夜號踊不絕歸服喪禮過成人鄉里奇之位至司

徒

毛義字少卿廬江人家貧以孝行稱張奉嘗往候之府檄適至以義爲安陽令義捧檄而入喜動顏色奉心賤之及母死徵辟皆不就奉乃曰賢者固不可測徃日之喜乃爲親屈也建初中章帝下詔褒寵賜穀千斛常以八月長吏問起居加賜羊酒

董黯慈谿人事母至孝以母嗜溪水徙居其旁遂成邑裏因名縣焉比鄰王寄以母時嘗諷寄寄惡之伺黯出辱其母黯恨之後母死斬寄首以祭自陳于官和帝詔釋其罪且旌異行召拜郎中不就

鄧彪字智伯禹之族父少勵志修孝行父卒讓國與異母

弟荆鳳明帝高其節許之和帝時進太傳錄尚書事賜爵關內侯

顏烏會稽烏傷人事親孝父亡負土成墳群烏啣土助之其吻皆傷因以名縣

隗相犍爲人事父母至孝母惡江邊水不潔必得江心水乃食相以舟汲之患其流急後江心忽湧出一石舟乃可依人以爲孝感所致朝廷徵爲郎

顧翔吳人少失父事母孝母好食雕胡飯躬自採擷供養家近太湖湖中乃生雕胡無復雜草得以爲養郡縣旌之

江革齊國臨淄州人失父獨與母居遭天下亂盜賊並起

常採拾以爲養數遇賊欲將去革輒涕泣求哀言有老母賊以是不忍犯之轉客下邳貧窮裸袒行傭以供母每當歲時縣當索比革以母老不欲搖動自在轅中輓車不用牛馬由是鄉里稱之曰江巨孝太守嘗備禮召革以母老不應及母終廬於墓側服竟不忍除臨淄令楊音特設席顯異之親奉錢以供養

祭彤潁陽人早孤至孝遇天下亂野無烟火獨處塚側每賊遇見彤尚幼有至節皆竒而哀之位至太僕

彭修字子陽會稽毗陵人年十五時父爲郡吏得休與修歸道爲賊所劫修拔佩刀前持盜帥曰父辱子死卿不顧死耶盜相謂曰此童子義士也不宜逼之遂辭謝而

去鄉黨稱其名

杜孝已郡人少失父事母盡孝充役成都不得朝夕在側知其母喜食生魚乃截竹筒貯水盛魚二頭以草塞之置江中祝曰我母必得此已而其妻偶出渚見竹筒橫流觸岸異而取視之乃有二魚含笑曰必我夫所寄也熟而進之於姑聞者嘆服

蕭固字秀異東海蘭陵人少孝謹連遭父母喪六年哀毀盡禮雉鵲遊狎其居麋鹿出入其門固子芝字英髦亦純孝官至尚書郎有雉數十棲宿其廬嘗上直雉輒送之飛鳴車側人以爲孝感所致

郭基京兆督郵班固稱其孝行著于州里

朱穆字公叔暉之孫五歲以孝稱未興元年擢冀州刺史
後拜尚書

申屠蟠字子龍陳留外黃人九歲喪父哀毀過禮廬于塚
側致甘露白雉之祥服除不進酒食十餘年每忌日輒
三日不食當時以孝稱

李曇潁川人少孤事繼母至孝

趙咨字文楚南燕人咨少孤有孝行盜嘗夜劫咨恐驚母
迎盜謝曰老母病須養乞少置衣糧妻于物一無所請
盜慚歎奔出咨追以物與之不及由是知名靈帝朝爲
燉煌太守

陸續吳人年六歲之九江見其舅袁術術出橘績懷數隻

出拜墮地術曰陸卽作賓客乃懷橘耶績跪荅曰將以遺母術大奇之

衛公佐華亭人少業舉子以親老棄去母郁早卒事繼母陳盡孝

陳紀字元方許州人兄弟孝養父寔歿紀每哀輒嘔血氣絕雖服除而積毀消瘳幾將戒性豫州刺史上其事尚書圖像以勵風俗

郭巨隆慮人家貧養母盡孝有子三歲每供饌母常減食與之巨謂妻曰兒分母饌母食不飽貧乏不能供子可再有母不可再得乃埋其子掘地三尺得金釜上有丹書曰天賜孝子郭巨官不得奪人不得取

丁蘭河內人少喪母刻木爲像事之若生朝夕定省隣人
張叔醉罵母像以杖擊其首蘭歸見母像色若不懌問
其妻且以告之即奮擊張叔吏捕蘭去像爲之垂淚郡
縣嘉其至孝通于神明奏之詔圖其形像

周磐字堅伯汝南安城人事母至孝居貧常以養母不克
爲歡和帝末舉孝廉歷任三地頻致祿養後省母還鄉
里及母歿哀慟幾于滅性服終廬墓側

戴伯鸞慎陽人性至孝母辛伯鸞居廬啜粥非禮不行與
弟良俱有毀容時人稱之

張遐字子遠餘干人幼時稱孝童

韋彪字孟達平陵人孝行純至父母卒哀毀三年不出廬

寢卧竟羸瘠骨立醫療數年乃起

蘇不韋平陵人父謙爲金城太守既罷私至洛陽爲司隸李嵩掠死以報宿怨不韋曰伍子胥何人哉遂變姓名募劍客邀嵩不克因殺其妾并及小兒及至魏郡掘其父塚斷頭以祭父墳嵩憤傷發病嘔血死

姜肱字伯淮彭城廣戚人與二弟俱以孝行著聞

孔奮魯人事母孝謹雖處儉約奉養必求珍膳躬率妻子同甘菜茹位至武威太守

歐寶未豐人性至孝父喪廬墓有衆逐虎入其廬寶蔽之幕內衆至問虎安在寶曰虎豈可藏耶衆乃去虎得免歲時啣鹿以供祭祀

孫期字仲或濟陰成武人事母至孝牧豕大澤中以奉孝
養

陸續會稽人爲州別駕從事坐楚王英事徵請廷尉續母
遠至京師覘候獄事特急無緣與續相聞但作饋食付
門卒以進之續雖見考苦毒而辭色慷慨未嘗易容惟
對食悲泣不能自勝使者怪問其故續曰母來不得相
見故泣耳使者問其故續曰吾母切肉未嘗不方斷葱
以寸爲度今餽食如是故知母來使者覘之果然獄吏
以聞得釋其罪同輩亦多寬縱

班超字仲升安陵人爲官寫書受直以養老母明帝聞之
除爲蘭臺令史

古初長沙人遭父喪未葬隣人失火初匍匐柩上以身扞
火火爲之滅

方儲字聖明歙人幼喪父事母孝母卒終日負土成墳種
奇樹千株有白兔遊其下

程堅字謀父南陽人居貧以磨鏡給養母母喪哀號櫬下
有馬每聞堅哭輒淚出輟草

鮑未高城人事後母至孝妻嘗於母前叱狗未即去之位
至趙州牧

馮豹行子也後母惡之嘗因豹夜寐欲行毒害豹走得免
敬事愈謹時人稱其孝位至尚書

竇章居貧蓬戶蔬食躬耕孝養位至大鴻臚

續文獻通考

卷之六十九

十一

三百八十四卷左

樂恢父爲縣吏得罪於令收將殺之恢年十一俯伏寺門
晝夜號泣令聞而矜之即解出其父位至騎都尉

汝郁性仁孝年五歲母病不能食郁常抱持啼泣亦不食
母憐之強爲飯宗親共異之因字曰叔異

黃香字文強江夏人年九歲失母思慕憔悴殆不克喪鄉
人稱其孝獨養其父躬執勤苦夏則扇枕席冬則以身
溫被太守劉護表而異之名聞於世

鄧閭字鵬之新野人年少孝行尤著母新野君死與兄隲並
居塚次

袁閎字夏甫汝陽人父賀爲彭城相閎兄弟迎喪衰經
扶柩冒犯寒露體貌枯毀手足血流見者莫不傷之

嚴舉巴郡人延熹中爲父行喪踰禮旌表門閭舊有嚴孝
子碑在郡儀門

楊震字伯起華陰人少孤貧獨與母假地種植以給供養
諸生嘗有助種藍者震輒拔更種以拒其後鄉里稱孝
位至太尉

張武具郡由奉人父與賊戰亡失屍骸武時年幼不及識
父後至太學受業每節嘗持父遺劒至亡處祭酹泣而
還太守第伍倫嘉其行舉孝廉遭母喪過毀絕命

劉茂少孤獨與母居家貧以筋力致養孝行著於鄉里位
至侍中

孔融字文舉魯人年甫十三喪母哀悼過毀扶而後起州

續文獻通考

卷之六十九

十三

三百年共新

里歸其孝又嘗以匿張儉事與兄褒爭死位至大中大夫

沈瑜沈儀烏程人瑜十歲儀九歲父亡居喪毀瘠過于成人外祖盛孝章慰之曰汝並黃中通爽終成奇器何遽逾制自取滅性耶

薛包汝南人父娶後妻而憎包分出之包日夜號哭不能去至被毆扑不得已廬于外旦入洒掃父怒又逐之晨昏不廢積歲餘父母慙而還之

郭泰字林宗介休人有至性遭母憂嘔血發病歷年乃瘳茅容字季偉陳留人年四十耕于野避雨樹下獨箕踞郭泰見而異之因求宿明旦殺雞泰意爲已設也既而以

供母自以草蔬與客同飯泰起揖曰卿賢乎哉郭林宗尚減三牲之養以供賓客卿乃能如此勸使就學卒成令德

胡廣字伯始華容人爲太傳年已八十繼母在堂朝夕瞻省傍無几杖言不稱老及母卒居喪盡哀率禮無愆鮑昂有孝義節行初父得病數年昂俯伏左右衣不解帶及處喪毀瘠抱負乃行服闋遂潛於墓次不關時務蔡邕字伯喈陳留人性篤孝母常滯病三年邕自非寒暑未嘗解襟帶不寢寐者七旬母卒廬於墓側有馴兔遶其室又木生連理遠近奇之

朱雋上虞人少孤母嘗販繒爲業雋以孝養致名位至大

司農

田豐少喪親居喪盡哀日月雖過笑不至哂

徐庶字元直長社人嘗薦諸葛亮于劉備及母爲曹操所
獲乃辭備曰本欲與將軍共圖大事今失老母方寸亂
矣請從此別遂歸操然亦不爲謀事也

續文獻通考卷之六十九終

續文獻通考卷之七十

皇明進士雲間王圻纂輯

節義考 孝子二

魏

鮑出字文才扶風人興平中三輔亂出與母兄弟五人家
居本縣以饑餓留其母守舍行採蓬實得數升使其二
兄初雅及其弟成先持歸爲母作食出獨與小弟在後
到家而母爲噉人賊所掠初等怖恐不敢逐之出攘臂
結衽獨追之斫殺四五人已又殺十餘人賊乃解還出
母并還其北舍媼建安五年出來北歸而母不能步行
兄弟共輿之出謂不如負之安乃以籠盛其母獨自負

之到鄉里士大夫嘉其孝烈

蜀漢

李餘涪城人年十三父殺人出亡母下獄餘乞代母死吏不許遂自殺郡以狀聞詔圖像府庭

黃朗以父嘗爲卒伍後爲郡長常忌不呼鈴下伍伯而呼其姓至于忿怒亦終不言

王脩字叔治營陵人年七歲喪母母社日亡來歲隣里社脩感念亡母哀甚初喪隣里聞之爲之罷社位至奉常趙昱年十三母嘗病經三月昱慘戚消瘠目不交睫握粟出卜祈禱泣血鄉黨稱其孝

吳

斯敦東陽人赤烏初父偉爲廷尉失議當死敦叩關泣血
乞以身代吳主嘉其孝赦偉罪仍表其閭

顧悌字子通吳人悌每得父書常洒掃整衣服更設几筵
舒書其上拜跪讀之每句應諾畢復再拜若父有疾耗
則臨書垂涕聲語哽咽父終悌飲漿不入口五日大帝
祖令悌釋服悌雖以公義自割猶以不見父喪常畫壁
作棺柩象設神座於下每對之涕泣服未闕而卒

劉宗爲吳令時不得將家之官每得時物先以寄母及聞
母亡犯禁委官

時禁長吏以喪去官

特爲減死一等復使爲官蓋

優之也

夏方字文正會稽永興人家遭疫癘父母伯叔群從死者

十有三人方時年十四夜則號泣悲慟晝則負土營墳
十有七年而畢廬於墓側烏鳥猛獸馴擾其旁宛頸同
遊不擇巢以棲人以爲孝感所致

孟宗字武恭江夏人孟子十九代孫母嗜笋冬月無笋宗
入林泣之笋遂生得以供母

陳表與兄修異母而表庶出修亡表母不肯事修母表謂
其母曰兄不幸早亡表統家事當奉嫡母如母若能爲
表屈情承順嫡母是至願也若不能直當出別居耳母
從其言善事嫡母

晉

王祥字休徵臨沂人性至孝早喪母繼母朱氏數苦之每

使掃除牛下祥愈謹父母疾不解帶湯藥必親嘗有丹
柰結實母命守之每風雨祥輒抱樹而泣母冬月思魚
祥卧冰求之忽有雙鯉躍出又思黃雀炙有黃雀自投
于幙因得供母母終居喪毀悴杖而後起

夏孝先桐廬人父亡負土成墳廬其側時有野火燎山將
近塋域孝先逃墓號慟鳥獸羣集以毛羽濡水灑火俄
頃撲滅

山濤河內人居貧事母曲盡孝道後爲吏部尚書濤以母
老心在色養旦夕不倦母卒時濤年已六十居喪過禮
負土成墳手植松柏時人稱之

司馬芝字子華河內溫人少爲書生避亂遇賊同行者皆

棄老弱走芝獨坐守老母賊至以刃臨芝芝叩頭曰母老惟在諸君賊曰此孝子也殺之不義遂得免害以鹿車推載母居南方十餘年躬耕以養

李信遼東襄平人父敏河內太守去官歸鄉里遼東太守公孫度欲強臣之敏乘輕舟浮海莫知所從信追求積年無所見因不聘娶或以不孝莫大於無後勸使娶妻旣生子宜伯遂絕房室常如居喪不堪其憂數年而卒子宜伯亦以孝聞

范宣字宣子陳留人年十歲嘗以刀傷手奉手改容人問痛耶荅曰不足爲痛但受親之全體而致毀傷不可處耳家人以其年幼而異焉家至貧儉躬耕養親親沒負

土成墳廬於墓側

盛彥字翁子廣陵人母王氏因疾失明彥每語及未嘗不流涕母食必自哺之有婢數見捶撻伺彥暫出取螬蟻炙飼之母食以爲美然疑是異物密藏以示彥彥見之抱母慟哭幾絕母目豁然即開從此遂愈

王延字延元西河人九歲喪母泣血三年幾至滅性每至忌月則悲啼三旬繼母卜氏遇之無道恒以蒲穰及敗麻頭與延貯衣其姑聞而問之延知而不言事母彌謹卜氏嘗盛冬思生魚使延求而不獲杖之流血延尋卧冰叩冰而哭忽有一魚長五尺涌出冰上延取以進母食之積日不盡於是心悟撫延如已生延事親盡色養

夏則扇枕席冬則以身溫被隆冬盛寒身無全衣而親極滋味父終廬於墓側

稽紹字延祖譙郡人中散大夫康之子十歲而孤事母至孝和色柔聲常若不及親執刀俎以他人不如已之誠至也

孟陋武昌人嘉之弟也少孤喪母毀瘠殆至減性不飲酒食肉十有餘載親族迭勸曰聖人制禮令賢者俯就不肖者企及若毀性無嗣更爲不孝陋感此言然後從之由是名著海內

許孜東陽吳寧人二親歿柴毀骨立建墓於縣之東山躬自負土不受人助列植松柏五六里時有鹿犯其栽松

孜悲嘆曰鹿獨不念我乎明日忽見鹿爲猛獸所殺置於所犯栽松下孜悵惋不已乃爲作塚埋於隧側猛獸即於孜前自撲而死孜益嘆息又取埋之積二十年乃立宅墓次朝夕奉亡如存鷹雉栖其梁檐鹿與猛獸擾其庭園邑人號其居爲孝順里成帝咸康中太守張虞上疏言孜孝行有詔旌表門閭蠲復子孫子生亦有孝行圖孜像於堂朝夕拜焉

吳達吳興人經饑疫合門死者十有三人達時亦病篤喪皆隣里以葦席裹而埋之達夫妻旣存家極貧窘冬無衣被晝則傭賃夜燒塼甓晝夜在山未嘗休止夜行遇虎虎輒避之期年成七墓十三棺時有贈賻一無所受

太守張崇義之以羔雁之禮禮焉

符表符朗兄子也年十六母姜氏有疾晝夜省侍母一食表亦一食母不食將絕表感咽而殞太守爲表其墓

馮恢長樂人父爲私農太守愛少子淑欲以爵傳之恢父終服闋乃還鄉里結草爲廬陽瘖不能言淑得襲爵恢始仕爲博士祭酒

吳隱之字處默雍城人年十餘父卒每號泣行人亦爲落淚事母孝謹及執喪哀毀過禮

辛堆有孝性居父憂哀毀異形殆不可識

王談吳興烏程人年十歲父爲隣人竄度所殺談陰懷復讐志而懼爲度所疑寸刃不畜至年十八乃密市利鐮

陽若耕鋤者後以鋪殺之歸罪有司太守孔巖義其孝
勇列上宥之吳元興中舉孝廉不應卒于家

桑虞字子深魏郡黎陽人仁孝天成年十四喪父毀瘠過
禮日以米百粒用糝藜藿其姊諭之曰汝毀瘠如此必
至滅性滅性不孝宜自抑割虞曰藜藿雜米足以勝哀
何琦字萬倫司空充之從兄也琦年十四喪父哀毀過禮
事母朝夕色養常患甘鮮不贍乃爲郡主簿丁母憂居
喪泣血杖而後起停柩在殯爲鄰人所逼撫棺哀號俄
而風止火息僅免一間其精誠所感如此

吳猛豫章人少有孝行夏日常手不驅蚊懼其去已而噬
親也

王裒字偉元城陽營陵人父儀爲魏安東將軍司馬司馬
昭東關之敗問於衆曰近日之事誰任其咎儀對曰責
在元帥昭怒曰司馬欲委罪於孤耶遂引出斬之裒痛
父非命於是隱居教授終身未嘗西向而坐示不臣晉
也廬於墓側旦夕常至墓前拜跪攀柩悲號涕泣着樹
樹爲之枯母性畏雷母卒每雷輒到墓曰哀在此及讀
詩至哀哀父母生我劬勞未嘗不三復流涕門人至爲
廢蓼莪之篇

何曾荀顗俱以孝稱傳玄嘗曰古稱曾閔今日荀何又稱
其能以文王之道事親

丘昂吳興人家貧好學織屨自給與弟給事中夷太守矩

並以孝行著時稱三丘

王接字祖遊幼喪父哀毀過禮鄉親皆嘆曰王氏有子哉
母終柴毀骨立居墓次積年位至征虜將軍司馬

庾闡鄆陵人少隨舅孫氏過江母隨兄肇爲樂安長史在
項城永嘉末爲石勒所陷闡母亦歿闡不櫛沐不婚宦
絕酒肉垂二十年鄉里稱之

趙煥父琨爲司馬勲殺而棄其屍煥求父屍不得乃悲號
不反忽有群鳥悲鳴從山來因得父屍

陳遺吳郡人少爲郡吏母好食鰾底飯遺在役每煮食輒
錄其焦以遺母後孫恩作亂聚得數升恒帶自隨及敗
逃竄多有餓死遺以焦飯得生初母念遺晝夜號泣目

爲損遺還入戶再拜號咽母目豁然復明

劉宋

孫法宗一名宗之吳興人父隨孫恩入海被害屍骸不收
母兄並餓死法宗年小流迸至十六方得還霜行草宿
營辦棺槨造立塚墓葬母兄儉而有禮以父屍不測入
海尋求聞世間論是至親以血瀝骨當悉凝浸乃操刀
泐海見枯骸則刻肉灌血如此十餘年臂脛無完皮血
脉枯竭終不能逢遂衰經終身常居墓所山禽野獸皆
悉馴附嘗忽苦頭瘡夜有天使女人至曰取牛糞煮傅
之即驗一境頌之終身不娶

臧盾字宜卿莒人居父母喪五年不出廬形骸枯瘁家人

不識高祖聞而嘉之除丹陽尹遷御史中丞卒謚曰中
劉瑜歷陽人七歲喪父事母至孝年五十二又喪母三年
不進鹽酪號泣晝夜不絕聲勤身力以營葬事服除二
十餘年布衣蔬食言輒流涕嘗居墓側文帝元嘉初卒
郭世道會稽永興人年十四喪父居喪殆不勝哀家貧傭
力以養繼母婦生一男夫妻共議曰勤身侍養力猶不
足若養此兒所費者大乃垂泣瘞之母亡負土成墳親
戚咸共賻助微有所受葬畢傭賃還其直服除後哀感
思慕終身如喪者元嘉初哀愉表其淳行文帝嘉之勅
表門閭蠲其稅調改所居獨楓里爲孝行里

賈恩會稽諸暨人少有志行元嘉三年母亡居喪過禮未

卷之十一
八
塋爲隣人所逼恩及妻柏氏號哭奔救俱燒死隣近赴
救毋襯得免有司奏旌其里爲孝義里蠲租布三世追
贈天水郡顯親左尉

潘綜吳興烏程人孫恩之亂妖黨攻破村邑綜與父驃共
走避賊驃年老行遲賊轉逼驃語綜我不能去汝走
可脫幸勿俱死驃困乏坐地綜迎賊叩頭曰父老年乞
賜生命賊斫驃綜抱父於腹下賊斫綜頭面凡四創綜
時悶絕有一賊從旁來相謂曰此兒以死救父云何可
殺殺孝子不祥乃父子並得免元嘉四年有司奏改其
里爲純孝里蠲租布三世

王彭亨台直瀆人少喪母元嘉初父又喪家貧力弱無以

營葬兄弟二人晝則傭力夜則號感鄉里哀之戶各出夫力助作碑磚湏水而天旱穿井數十丈泉不出墓去淮五里荷檐遠汲困而不周彭號天自訴如此七日一旦大霧霧歇磚竈前忽生泉水鄉隣並嗟神異葬竟水即竭元嘉九年太守劉伯龍表言改其里爲通靈里蠲租三世

崔懷慎河東武城人父弋利魯郡太守元嘉中爲魏所獲懷慎與妻房氏篤愛聞父見虜即日遣妻布衣蔬食如居喪禮歲時北嚮流涕泰始初淮北入魏懷慎因此歸北至代都而父已卒懷慎絕而復蘇載喪還青州徒跣冰雪上氣寒酷而手足不傷時以爲孝感

張楚益州梓潼人母疾命在屬續楚祈禱苦至截指自誓精神感格疾應時得愈元嘉中詔榜門曰孝行張氏之間易其里爲孝行蠲租布三世身加旌命

張敷字景胤吳郡人生而母歿十許歲求母遺物得一蠶扇乃緘錄之每感恩輒開扇流涕父亡吳興奔喪成服十餘日始進水漿葬畢不進塩菜遂毀瘠成疾而卒孝武贈侍中改其所居曰張孝里

余齊民晉陵人也少有孝行大明初父卒于家齊民忽語人曰比肉痛心煩有如割必有異故尋而訃音至日夜行四百里母子相對慟絕復蘇問父遺言母曰恨不見汝齊民曰相見何難亟走殯所號頃而殯郡以事聞詔

更所居里曰孝義鄉祖布賜其母穀百斛

蔡廓字子度陳留考城人仕晉爲著作郎孝武時遷爲太尉從事中郎未拜遭母憂三年不櫛沐奉兄執如父家事大小皆咨而後行

臧熹字德仁莒人以母老家貧與弟熹躬耕約已養親者十餘年父母亡居喪六年以毀瘠著稱宋武帝以后兄徵拜太常所得俸與親戚共卒贈樂祿大夫

郭原平字長泰永興人世道子也梟至行養親必以已力每爲人傭作主人設食原平自以家貧父母不辦有味唯食鹽豉而已若家或無食則虛中竟日義不聞飽湏日暮作畢受直歸糴買然後舉饗父篤疾彌年衣不解

帶口不嘗鹽積寒暑未嘗睡卧父亡哭踊慟絕數日方
蘇以營塋凶工不欲假手而已又不解作乃訪邑中有
營墓者助人運力父乃閑練又自賣爲十夫客以供衆
費父喪終自起兩小屋爲祠堂每至節歲常於此哀思
絕飲粥自父服除後不復食肉母終毀瘠彌甚父墓前
耕田者恒裸袒原平貴買其田農月束帶垂泣躬耕
焦華父遺曾病甚冬中思瓜忽夢人謂華曰而父思瓜故
送助養呼從者進之華跪受寤而瓜在手其香非常父
食之病愈

丘傑字偉時吳興烏程人年十四遭母喪以熟菜有味不
嘗常食生菜因而過毒忽夢母曰死止是分別耳何事

乃爾荼苦汝噉生菜遇蝦蟆毒靈床前三丸藥可取服之傑驚起視果得甌中藥服之下科斗子數升丘氏世保此甌

錢延慶烏程人父仲期爲同郡奚慶恩所殺時延慶屬役在都聞父死馳還於庾浦埭逢慶恩手刃殺之自繫烏程獄吳興太守郗顯表不加罪許之

秦綿河南孝廉母喪送葬不忍還鄉人爲作茅庵止其中遇有米則食粥無米食菜而已哀號之聲行者爲之墮淚

謝朓字宣鏡幼有殊行年數歲所生母郭氏久嬰痼疾晨昏溫清嘗藥奉侍不息恐僕役懈倦躬自執勞母病長

驚一家尊卑感贈至性咸納屢而行屏氣而語如此十餘年

何子平會稽人爲海虞令母喪去官哀毀踰禮每哭踊頓絕方蘇屬宋末造東土饑荒繼以師旅八年不得營葬晝夜號哭常如袒括之日冬不衣絮夏不就涼一日以米數合爲粥不進塩菜所居屋敗不蔽風日兄子伯興欲爲葺理子平不肯曰我情事未申天地間一罪人耳屋何宜覆蔡興宗爲會稽太守甚嘉矜賞爲營塚壙師覺授涇陽人與宗少文並有素業以琴書自娛路遇一人貽書函題曰至孝師君苦前俄而不見覺授即奔歸母果歿一號而絕良久乃蘇後撰孝子傳八卷

顧歡鹽官人燃松讀書幼有孝行母亡水漿不入口者七日廬于墓遂隱不仕

樂頤之字文德涇陽人仕宋爲京叅軍父在郢病亡頤之忽悲因請假還中塗得凶問徒步奔赴勺水不入口數日嘗遇病與母隔壁忍而不言嚙被至碎恐母聞而憂也吏部郎庾杲之嘗往候頤之設枯魚菜菹杲之不能食母乃自出魚羹數種杲之曰卿過茅季偉我非郭林宗

袁昂字千里陽夏人察從弟初武帝誅父顓藏其首于武庫以涑題誌會赦乃還顓首昂號痛嘔血絕而復蘇以淚洗所題字皆藏人以爲孝

袁最陽夏人順帝昇平初父粲謀誅蕭道成不克被獲劉
僧靜奮刀直前欲劈之最大叫抱父乞死兵士莫不殞
涕

齊

華寶無錫人晉義熙末父豪戍長安寶年八歲臨別父謂
曰我還爲汝冠後長安陷寶年七十不婚冠或問之不
忍荅輒號慟彌日太祖建元三年詔表門閭

蕭敞明南蘭陵人母病風積年沉卧敞明晝夜祈禱時寒
敞明下淚或叩頭血出皆爲冰忽有人授之石函曰此
療夫人疾發函惟三寸絹書日月字母服之即平復後
母卒敞明哀慟亦卒武帝永明五年詔曰敞明喪過乎

哀遂致毀滅可贈中書郎

王虛之石陽人年十三歲喪母三十三喪父鹽醋不入口者二十五年哀毀備至永明中詔旌其門復三世

孫淡太原人世居長沙事母至孝母疾不眠食以差爲期母哀之後疾不使知也建元三年旌表門閭

薛天生晉陵無錫人母遭艱菜食天生亦菜食母未免喪而死天生終身不食魚肉又同郡劉懷胤與弟懷則年十歲遭父喪不衣絮帛不食鹽菜建元三年詔並表其門閭

公孫僧遠會稽剡人居父喪至孝事母及伯父甚謹年饑僧遠省餐減食以養母及伯父兄弟亡貧無以葬身自

販鬻與隣里供送終之費建元三年虞炎表列詔表門
閭蠲其租布

劉璵沛郡相人幼有至性祖母病疽經年手持膏藥漬指
爲爛母孔氏甚嚴謂親戚曰阿稱便是今世曾子阿稱
璵小名也年四十餘未娶建元中太祖與司徒褚淵爲
娶王氏穿壁掛履土落孔氏床上孔氏不悅璵即出其
妻父喪足不出廬

剡縣小兒年八歲明帝建武二年與母俱得赤癰病母死
家人不令知小兒疑問云母嘗數問吾病昨來覺聲羸
今不復問何也因自投下床扶匍至母尸側頓絕而死
鄉隣告求表廬

庾黔婁字子正新野人性至孝爲屏陵令到縣未旬父易
在家遭疾黔婁忽心驚舉身流汗即日棄官歸時易疾
始二日醫云欲知差劇但嘗糞甜苦後泄痢黔婁輒取
嘗之味轉甜滑心愈憂苦每夕稽顙北辰求以身代俄
聞空中聲曰聘君壽命盡不復可延汝誠禱旣至故得
至月末晦而易亡黔婁居喪過禮廬於墓側

杜栖字孟山吳郡錢塘人隱士京產之子也栖肥白而長
比及京產病旬日便骨立京產亡水漿不入口七日晨
夜不罷哭不食塩菜每營買祭奠身自看視號泣不自
持朔望節歲絕而復蘇嘔血數升至祥禪祭夢見其父
慟哭而絕

王文殊字令章吳郡人文殊父沒于魏文殊思慕泣血終身蔬食不衣帛服麻縵而已不婚不交接人歲時伏臘月朔十五未嘗不望北長悲如此三十餘年太守孔琇之表其行詔榜門開改所居爲孝行里

陸彥師字雲房臨漳人父喪哀毀與兄卬廬于墓側負土成墳公卿重之多就墓次存問晦朔之際車馬不絕文宣聞而嘉歎旌表其閭號其所住爲孝終里

鮮于文宗漁陽人年七歲喪父父以種芋時亡至明年芋時對芋嗚咽如此終身

劉渢字處和南陽人母早亡父紹仕宋中書郎被勅納太后兄女路氏爲繼室渢始數歲路氏不以子視之已而

路氏生子瀟風憐愛之不忍舍路氏病經年風晝夜不離每有增加即涕泣不食路氏病差感其意慈愛遂隆劉靈哲所生母病靈哲躬自禱祈夢見黃衣翁與藥云食此疾可立愈靈哲驚覺於枕間得之如言而疾愈藥似竹根

傅琰靈州人爲尚書右丞遭母喪居南岸隣家失火延燒琰屋琰伏柩不動隣人競救得俱全琰股髀之門已被烟焰

庾道愍少孤貧所生母漂流交州道愍尚在襁褓及長知之求爲廣州綏寧府佐府去交州尚遠乃自負擔肩陰而進僅得自達求其母經年不獲日夜悲泣嘗入村值

暴雨寄止一家乃有一嫗負薪自外還道感心動因訪之即其母也于是俯伏號哭遠近聚觀莫不揮淚

江泌字士清考城人母早亡泌以生缺供養爲歎遇饑不
忍食食菜不食心惟食老葉母墓忽爲野火所燒泌哭
三日淚盡繼以血世謂之孝泌

袁廓之字思度陽夏人因父死非罪終身不聽音樂布衣
蔬食足不出戶誓不臣宋

斛叔謙字楚梁雁門人母有疾叔謙夜於庭中稽顙祈福
聞空中語云此病得丁公藤爲酒便差訪無識者乃求
至宜都郡遇見山中一老公伐木問其所用荅云此丁
公藤療風尤驗叔謙便拜伏流涕具言來意老公愴然

以四段與之并示以清酒法叔謙受之依法爲酒母飲之病即瘥

朱謙之吳郡錢塘人年數歲喪所生母父昭之假葬田側爲族人朱幼方燎火所焚同產姊宓語之謙之雖小便持刀殺幼方詣獄自繫

匡昕字令先廬陵人有至性母病亡已經日昕奔還號呼母即蘇皆以爲孝感

康祚扶風人有至行母患乳癰諸醫療不愈康祚跪兩手捧癰大悲泣母即覺少寬因此漸差時人以其有冥應韓靈敏會稽剡人早孤與兄靈珍並有孝性尋母亡家貧無以營葬兄弟共種瓜半畝朝採暮生已復如此遂辦

葬事人以爲神助

梁

吉玃字彥霄馮翊蓮勺人玃幼有至性年十一遭所生母憂水漿不入口殆將滅性天監初父任具興原鄉令爲吏所誣逮詣廷尉玃年十五號泣衢路祈請公卿樞登聞鼓乞代父命武帝異之尚以其童幼疑受教於人勅廷尉嚴加脅誘取其款實玃不改辭乃宥其父丹陽尹王志欲以歲首舉克純孝玃曰因父買名一何其辱拒之而止

李慶緒廣漢鄆人也父爲人所害慶緒九歲而孤爲兄所養日夜號泣志在復讐授州將陳顯達仍於部伍白日

手刃其仇自縛歸罪州將義而釋之天監中爲東莞太守毋憂去職廬於墓側每慟哭嘔血數升

滕曇恭南昌人五歲能孝母楊氏患熱思瓜非其時也曇恭歷求不得啣悲遇一僧問故曰我有一瓜相遺持歸舉室驚異天監中表異之號滕曾子

成景雋范陽人天監六年常邕和殺雋父淮陽太守安樂以城內附普通六年邕和爲鄱陽內史景雋購人刺殺之未久重購邕和家人鳩殺其子弟噍類無遺武帝義之每爲屈法

蔡景仁廣平人父天監初爲同縣韋法所殺景仁時年八歲及長志在復讐普通七年遇法於公田淸手斬其首

以祭父墓事竟請郡自縛乞依刑法太守蔡天起上言
于州時簡文在鎮下教褒美原其罪下屬長蠲其一戶
租調以旌孝行

劉覽字孝智彭城安上里人以所生母憂廬於墓不嘗鹽
酪冬止着單布衣家人慮其不勝喪中夜竊寘炭於床
下覽因暖氣得睡既覺知之號慟嘔血高祖聞其至性
數遣省視

阮孝緒字士琮陳留尉氏人武帝時嘗於鍾山聽講母王
氏忽有疾兄弟欲召之母曰孝緒至性冥通必當自到
果心驚而歸隣里嗟異之合藥須得生人侵舊傳鍾山
所出孝緒躬歷幽險累日不逢忽見一鹿前行孝緒感

而隨後至一所遂就視果獲此草母得服之遂愈時
皆言其孝感

蕭修字世和宗室子性至孝年十二丁所生徐氏艱自荊
州反葬中流遇風脩抱柩長號血淚俱下隨波搖蕩終
得無虞葬訖因廬墓次先是山中多猛獸至是絕迹野
鳥馴狎栖息簷宇武帝嘉之頒告宗室

庾沙彌鄢陵人父珮王坐沈攸之事誅沙彌五歲輒不肯
衣采母問其故流涕對曰家門禍酷用是何爲嫡母劉
氏寢疾沙彌晨夕侍側衣不解帶或應鍼灸輒以身先
試及母亡冬日不衣綿纊終喪不食塩味晝夜號慟墓
在新林忽生稻松百許枝葉鬱茂劉好嗽蔗沙彌遂不

食馬武帝召見嘉之育其二子

沈崇係字思整其興武康人六歲丁父憂哭踊過禮及長事所生母至孝家貧常傭書以養母母卒崇係以不及侍疾將欲致死水漿不入口晝夜號哭旬日殆將氣絕以兄諭乃稍進食母權瘞去家數里哀至輒之瘞所不避風雨倚墳哀慟飛鳥翔集夜恒有猛虎來望之有聲狀如嘆息者遷葬無力行乞經年始獲葬焉旣葬廬於墓側自以初行喪禮不備後更服三年食麥屑不噉塩酢坐卧於單薦因虛腫不起武帝聞即遣中書舍人慰勉之詔令釋服擢補太子洗馬旌其門閭

甄恬字彥約中山無極人數歲喪父哀戚若成人家人矜

其小以肉汁和飯飼之恬不肯食嘗恨生不識父悲泣
思感忽若有見言其形貌則其父也居喪廬墓側有鳥
玄黃雜色巢于樹恬哭則鳴又有白雀棲廬之異梁主
旌其閭

韓懷明上黨人客居荊州年十歲母患屍疰每發輒危殆
懷明夜于星下稽顙祈禱時寒甚切忽聞香氣空中有
人語曰童子毋須臾求瘥無勞自苦未曉而母豁然平
復鄉里異之十五喪父負土成墳賻助不受帥南陽劉
虬虬一日廢講涕泣云是外祖亡日時虬母亦亡矣懷
明即日還家養母朝夕不離側母年九十一終懷明水
漿不入口一句號哭不絕聲有白鳩巢其廬上

江德藻華之子性至孝與異產昆弟居恩惠甚篤仕漢爲
尚書比部郎以父憂去職服闕後容貌毀瘠如居喪時
弟從簡位司徒從事中郎侯景亂爲任約所害子兼叩
頭流血乞代父命以身蔽刃遂俱見殺

蕭統字德施梁高祖太子所生母薨水漿不入口哭輒慟
絕

蕭放字希夷居喪以孝聞所居廬有慈烏來集人以爲孝
感

庾子輿字孝卿新野人性至孝母亡哀輒嘔血父域出守
巴西子輿乞從養後父卒哀慟將絕者再奉喪還鄉巴
東有灩澦石最險其次則瞿塘子輿至值秋水暴壯撫

心長號其夕水驟退明且旣南下水復如故行人爲之語曰灩澦如幘本不通瞿塘水退爲庾公

江紉字含潔考城人性至孝年十三父患眼紉侍疾將期月衣不解帶夜夢一僧云患眼者飲慧眼水必差紉乃捨里舍爲寺及就創造因泄故井其水清冽取以洗眼煮藥遂瘥時謂之孝感及父卒紉廬于墓終日號慟不絕聲月餘卒

何炯字士光廬江潯人父疾衣不解帶頭不櫛沐容貌毀瘁及卒號門成疾卒

陸襄餘千人母常猝患心痛醫方湏三反水漿是時冬月日又逼暮求索無所忽有老人詣門貨漿如方劑始欲

綱目通考卷之七十
酬直無何失之時以爲孝感

高真與弟謚俱至孝父亡治喪墓次甘露白雉降集詔表其閭里

劉景所河東人事母孝謹母常病癖三十餘年一朝而瘳鄉里以爲誠感

張稷字公喬母遭疾年十一侍養衣不解帶或竟夜不寢及終毀瘠杖而後起兄璿善彈箏稷以母嘗熟此技聞之悲感頓絕遂不聽父求及嫡母繼殂六年廬于墓側荀匠字文師潁陰人父法超仕齊爲安復令卒于官匠聞號慟幾絕至夜乃蘇旣而奔喪扶襯至家極力營葬居憂歷四年不出戶不櫛沐髮皆禿落號哭無時聲盡繼

之以泣目皆皆爛形體枯悴雖家人不復識之

阮卓尉氏人性至孝父問道卒于官卓年十五自都奔赴水漿不入口者累日載柩還都中流遇疾風船幾沒者數四卓仰天悲號俄而風息人以爲孝感所致

蕭勵字文約宗室子也爲太子洗馬母憂去職殆不勝喪每一思至必徒步之墓所或遇風雨仆卧中路坐地號慟起而復前家人不能禁父景薨於郢鎮勵奔赴江夏不進水漿者七日廬於墓所親友隔絕悲慟嗚咽傍人亦爲隕涕

夏侯祥字叔夏譙郡人年十六遭父艱居喪哀毀三年廬於墓常有雀三足飛來集其廬戶衆咸異焉

宋璣字普少以孝行稱母魯病秋月思瓜不已璣夢見
求而隨獲時人稱異

謝蘭字希如陳郡陽夏人蘭五歲時父未食乳媼欲令先
飲蘭終不進及丁父憂晝夜號慟毀瘠骨立母阮氏常
自守視譬抑之後使魏母卒還入境夜夢不祥旦便投
刺馳歸及至號慟嘔血氣絕久之水不入口每哭眼耳
口鼻皆流血經月餘竟因夜臨而卒

褚修吳郡錢塘人性至孝父喪毀瘠過禮因患冷氣及丁
母憂水漿不入口二十三日每號輒嘔血遂以毀卒

王規字威明臨沂人八歲丁所生母憂居喪有至性太尉
徐孝嗣每見必爲之流涕稱曰孝童

劉孺字孝稚彭城安上里人年十四居父喪毀瘠骨立宗
黨咸異之爲吏部尚書以母憂去職居喪未朞以毀卒
嚴植之字孝源建平秭歸人性純孝少遭父憂因菜食二
十三載餘後得風冷疾乃止

庾萼字休野新野人年十歲遭父憂居喪毀瘠爲州黨所
稱

徐普濟長沙臨湘人居喪未葬而隣火起延及其舍普濟
號慟伏棺以身蔽火幾被焚隣人往救普濟已悶絕累
日方蘇

劉霽字士烜平原人十四居父憂有至性每哭輒嘔血母
明氏寢疾霽年已五十衣不解帶者七旬誦觀世音經

數萬遍夜中感夢見一僧謂曰夫人筭盡君精誠萬幸
當相爲申延後六十餘日乃亡瘞廬於墓哀慟過禮常
有雙白鶴馴翔廬側

劉曇淨字元光彭城人父慧鏡以孝聞曇淨篤行有父風
父卒于官曇淨奔喪不食飲者累日絕而又蘇每哭輒
嘔血服闕因毀成疾事母尤淳至身營餐粥不以委人
母疾衣不解帶及母亡水漿不入口者殆旬母喪權
瘞藥王寺天寒曇淨身衣單布廬于墓所晝夜哭臨不
絕聲哀感行路未暮而卒

劉苞字孝嘗彭城人年四歲而父終及六七歲見諸父常
泣母謂兒憚諸父顯貴邪苞曰早孤不及識父聞諸父

多相似故心中嘆悲無有他意

袁君正少聰敏年數歲父疾晝夜不眠專侍左家人勸令暫卧答曰父疾未差眠亦不安

陳

吳明徹字通昭秦郡人性至孝年十四念父母墳塋未治乃勤力耕種時天下亢旱苗稼焦枯明徹哀憤常于田中號哭仰天自訴數日有自田還者云苗已更生明徹往視果如言秋遂大穫足充葬用

司馬延義建昌人事親孝居喪哀毀朔望日詣墓哭奠終始如一

司馬嵩字之昇河內溫人年十二母病禱于先祠願以身

代母病得痊後母卒孺慕過禮水漿不入口經二旬每
號慟必至悶絕及父卒廬墓側日進麥粥一升豺狼絕
迹兩鳩馴狎

殷不害字長卿陳郡長平人性至孝居父憂過禮魏平江
陵失母所在時雪寒凍死者滿溝壑不害行哭求之見
死人溝中即投身捧視七日始得母每慙而哭輒氣絕
弟不佞亦以至孝稱

徐孝克東海鄒人性至孝侯景亂歲饑乃賣妻臧氏于富
室假穀帛以養母高宗時侍宴取珍果還以遺母因嗟
嘆勅所司餉其母

張昭字德明具郡人父煥嘗患消渴嗜鮮魚昭身自結網

捕魚以供朝夕弟乾字玄明亦有至性父卒兄弟並不
衣綿帛不食鹽醋目惟食麥屑粥一升而已每一感慟
必致嘔血鄰里聞其哭聲皆爲涕泣母陸氏繼亡兄弟
哀毀形容骨立親友莫識焉

徐份性孝友父陵嘗遇疾甚篤份燒香涕泣跪誦孝經晝
夜不息者三日陵遂愈

王知玄太原人僑居會稽剡縣居家以孝聞及丁憂哀毀
而卒宣帝嘉之詔改所居清苦里爲孝家里

北魏

關元明河東安邑人孝文太和五年爲北郡太守元明以
違親養興言悲慕母亦慈念泣淚喪明元明悲號上疏

請歸奉養以見其母母目便開刺史呂壽恩列狀上聞
詔下州郡表爲孝聞復其租調

長孫慮代人母因飲酒其父真呵叱之投之以杖便即致
死縣拘真處以重坐慮列辭尚書云父母忿爭本無餘
惡直以謬誤一朝橫禍今母喪未殯父病旦夕兄弟五
人並冲幼慮身居長今年十五有一女弟尚始四歲更
相鞠養不能保全父若就刑交墜溝壑乞以身代老父
命使嬰弱衆孤得蒙存立尚書爲奏孝文帝詔特恕其
父死罪慮從之遠流

王續生滎陽京縣人遭繼母憂居喪哀毀杖而後起及終
制鬻髮盡落有司以聞宣武帝旌表門閭蠲其徭役

李顯達陽翟人父喪形體毀悴六年廬于墓側哭不絕聲
殆于滅性州牧高陽王雍以聞靈太后詔表其門

郭文恭太原平遙人年踰七十父母喪亡文恭孝慕罔極
乃居祖父墓次晨夕拜跪跣足負土培祖父二墓寒暑
竭力積年不已見者莫不哀歎尚書聞奏旌表其閭

張昇滎陽京縣人喪父飲水絕塩哀毀過度髮落殆盡聲
聞邑里盜賊不侵其鄉州表以聞標其門閭

王崇字乾邕陽夏雍丘人兄弟並以孝稱身勤稼穡以養
二親母亡杖而能起鬢髮墮落椎殯宅西崇廬於殯所
晝夜哭泣母喪始闋復丁父憂哀毀過禮是年夏月風
電所經禽獸暴死草木摧折至崇田畔風電便止禾麥

十項無所損落及過崇地風電如初咸稱至行所感州
以聞奏表其門閭

楊引裘垣人三歲喪父爲叔所養事母至孝母年九十而
終引年七十五哀毀過禮三年服畢恨不識父追服斬
衰食粥衣麤誓終其身有司奏宜旌賞詔復其一門扁
其純孝仍詔集書標引至行又假以散員之名

崔承宗齊州人其父於宋世仕漢中母喪殯彼後歸魏遂
爲隔絕承宗性至孝萬里投險偷路負喪還京師黃門
侍郎孫惠蔚聞之曰吾於斯人見蘆范之情矣

瞿浩父疾篤浩乃剪爪截髮庭中仰禱斗極爲父請命求
以身代叩頭流血踰年不息家人罕有知者及父終居

喪盡禮時人稱之

楊固爲洛陽令丁母憂號慕毀脊杖而能起練禪之後猶酒肉不進時固年踰五十而喪過於哀鄉黨宗族咸加嘆服

楊玄就安西將軍仲宣之子仲宣爲爾朱氏所害就收捕時年九歲挽兵人謂曰欲害諸尊乞先就死兵人以刃斫斷其臂猶請死不止遂先殺之

北齊

陸邛字雲駒代人也父喪居憂哀毀骨立母魏上庸公主教訓諸子以義方邛克遵母訓動依法度朝廷發詔褒揚之改其所居里爲孝終里繼遭母喪哀慕毀悴遂至

沉篤頻伏牀枕致成風疾以弟搏死一慟而絕朝野悲之弟彥師亦有孝行

楊愔字萼彥魏太傅津之子幼喪父嘗詣舅子恭與之飲問讀何書曰誦詩子恭曰誦至渭陽未耶愔號泣感咽子恭亦對之戲歛爲罷酒後爲神武行臺右丞適罹家難常以喪禮自居哀毀骨立神武憫之嘗聘梁過家嘗佛寺見太傅容像悲感慟哭嘔血數升遂病瘵不成行

周

秦族洛川人性至孝事親竭力及父喪哀毀過禮每一慟哭酸感行路母沒哭泣無時惟飲水食菜而已終喪之後猶蔬食不入房室邑人上狀詔表其門閭

陸政吳郡人性至孝初祖載從宋武帝平關中遂居長安其母生長吳郡好食魚而北土艱得政求之甚苦後居旁忽水泉湧出而有魚遂得以供母時人以爲孝感因謂其泉爲孝魚泉

皇甫遐河東汾陰人少喪父事母以孝聞保定末遭母喪乃廬於墓側負土成墳晝夜勤力未嘗暫停食粥枕塊櫛風沐雨形容枯悴家人不識郡縣表上其狀有詔旌異之

寇雋馮翊人與兄某並有志行父亡雖久而猶於平生所處堂宇備設幃帳几杖以時節列拜垂涕陳薦吉凶之事必先啓告遠行往返亦如之

梁彥光字修芝安定烏氏人少有至性七歲父顯遇篤瘠
醫云必餌紫石英可愈彥光求之不得憂悴不知所爲
忽于園中見一物怪而持歸即紫石英也親屬咸異之
以爲至孝所感

柳遐字子昇河東解人有孝行父季遠卒于揚州遐自襄
陽奔赴六日而至哀感行路毀悴不可識後奉喪西歸
中流風起遐抱棺號慟懇天求哀俄頃風止浪息其母
嘗乳間發疽醫不能治或云得人吮膿可止其痛遐應
聲吮之母疽遂瘳咸以爲孝

隋

田德懋高平人丁父艱哀毀骨立廬于墓側負土成墳高

祖聞而嘉之降璽書存問賜帛及米下詔表其閭

楊慶字伯悅河間人祖玄父剛並以至孝知名慶年二十五郡察孝廉以侍養不赴母有疾不解襟帶者七旬及居母憂哀毀骨立負土成墳齊文宣表其門閭賜帛及綿粟各有差高祖受禪屢加褒賞

紐因字孝政河東安邑人性至孝父母喪廬於墓側負土成墳廬前生麻一株高丈許圍之合拱枝葉鬱茂冬夏恒青有鳥棲止因舉聲哭鳥爲悲鳴時人異之周武帝表其廬子士雄喪父復廬於墓側負土成墳庭前有一槐樹先甚鬱茂及士雄居喪樹遂枯死服闋還宅死槐復榮高祖聞之歎其至孝下詔褒揚號其居爲累德里

薛濬字道順河東汾陰人少孤養母以孝聞高祖聞濬事
母孝以其母老賜與服几杖四時珍味當世榮之後丁
母艱歸葬夏陽時隆冬極寒濬衰經徒跣冒犯霜雪自
京至鄉五百餘里足指凍墮瘡血流離朝野爲之傷痛
王頒字景彥太原祁人父僧辯爲陳武帝所殺號慟而絕
食頃乃蘇哭不絕聲毀瘠骨立服闋常布衣蔬食籍藁
而卧隋平陳夜發其陵焚骨取灰投水中而飲之旣而
自縛歸罪高祖義而釋之

田翼養母以孝聞其後母卧疾歲餘翼親易燥濕母食則
食不食則否開皇中母患暴痢翼謂中毒藥遂親嘗祓
惡母終翼一慟而絕妻亦不勝哀而死鄉人共厚葬之

朱昌寧永城人有孝行母病思瓜時方四月瓜未熟昌寧號哭于瓜田中一夕瓜盡熟昌寧取以奉母母食之即瘥開皇中有司以聞詔旌其門

裴子通聞喜人開皇中以大中大夫居母喪哭喪明有白鳥巢於塚樾兄弟八人皆有孝行詔書旌表世謂義門裴氏

翟普林楚丘人事親以孝聞父母疾親易燥濕不解衣者七旬大業初父母俱終哀毀殆將滅性廬于墓側負土成墳盛冬不衣繒絮唯著單縗而已

華秋汲郡人幼喪父事母以孝聞家貧傭賃養母秋容貌毀悴鬢髮盡改母卒廬於墓側負土成墳人欲助之者

系三廬通志卷之十一
二
秋輒拜而止之大業初有司大獵見一兔入秋廬馴狎
左右久而不去郡縣以狀聞詔遣使勞問旌其門後群
盜起往來廬之左右咸相戒曰勿犯孝子鄉里賴秋全
者甚衆

陳孝意河東人少有孝行煬帝大業中爲侍御史以父憂
去職居喪盡禮有白鹿馴狎其廬人以爲孝感未暮起
授雁門丞在郡菜食齋居朝夕哀臨未嘗不絕倒悴毀
骨立見者哀之

荆可河東猗氏人苦身勤力供養其母甘旨終無匱乏母
喪水漿不入口者三日悲號擗踊絕而復蘇葬母之後
廬於母側晝夜悲哭負土成墳不櫛沐菜食水飲哀感

遠近文帝令州縣表異之

劉士雋彭城人性至孝丁母喪廬于墓側負土成墳虎狼馴擾爲之取食文帝旌其門

李士謙字子約趙郡平棘人髫髻喪父事母以孝聞母曾嘔吐疑爲中毒因跪而嘗之

李孝子吉水人幼喪母哀毀踰禮事父孝養惟勤父歿未及葬比舍失火火驟至慟哭伏棺死有司世表其墓

陳果仁晉陵人事繼母以孝稱母病思牛炙適屠禁割股作羹以進病良已郡上其事詔表門閭

徐孝肅汲郡人事親以孝聞孝肅早孤不識父及長問其母父狀因圖其形構廟置之而定省焉朔望饗祭養

至孝母老疾孝肅親易燥濕憂悴歷歲見者憫焉母終茹蔬飲水盛冬單縗毀瘠骨立祖父母父母墓皆負土成墳廬於墓所垂二紀被髮徒跣以終其身弟倫德卒其子寔默亦廬于墓世以孝稱

李德饒柏人人性至孝父寢疾終日不食十旬不解衣及丁憂水漿不入口者五日哀慟嘔血數升葬之日會仲冬積雪行四十餘里單裘徒跣號踊幾絕

崔定博陵人丁父母憂齋居三十餘年蔬食衰服刻木爲像晨昏定省隋末群賊蜂起莫有侵掠者詔免其課役

續文獻通考卷之七十終